



Scuol: Cursa per creschids ed uffants

Dumengia passada ha gi lieu il 42avel «Passlung» cun 81 participants creschids e 93 uffants.



Il retg a la Voa Sartons

Dapi che Roger Federer ha gudagnà l'Australian Open è il vischin da Valbella il pli grond.

südostschweiz

LA QUOTIDIANA

Redacziun: Via Sommerau 32, 7007 Cuira, tel. 081 255 57 10, redacziun@laquotidiana.ch

A Laax irritescha l'ura-baselgia buc

■ (anr/abc) Els centers populai spess resenta glicud sensibla il tuchiez dil clutger-baselgia sco disturbis dil ruuas. En loghens turistics ein ils hospis pli tolerants. «Na, tier nus ei quei buc in tema», declara *Maurus Cavigelli*. Il president dalla pleiv catolica da Laax ha mai stuiu s'occupar da reclamaziuns pervia dil tuchiez. Tgi che fa opposiziun encunter quella spacia da «canera» survegn savens raschun. Tala glicud sereferescha silla lescha da ruuas. Gia avon onns ha la vischnaunca schau montar in cundrez che absorbescha il tun dallas fridas. Oz ein l'ura-baselgia ed il tuchiez plitost in simbol marcant da nosa cultura. Era a Flem ein ils hospis tolerants enviers il tuccher dils zenns. «Nus havein retschiert reclamaziuns perquei che las fridas dall'ura cumpleina tucchan buca pli», declara *Marco Maranta*.

> PAGINA 5

Success per empresa «BaKi»

■ (anr/sr) La sonda vargada ha la «BaKi», l'exposiziun da rauba e purschidas per famiglias, avi per l'impresa gas sias portas a Glion ella casa rosa sur il Spital regional Surselva. Tenor l'inizianta, *Sonja Lombviser*, ei l'impresa «BaKi» seplegada senza pli gronds incaps ed ella discuora d'in success. Cugl agid da sia amitga *Jessica Blumenthal* ha ella tratg il carr ed allas duas mummies giuvnis eis ei reussiu d'arranschar ina exposiziun cun ina vasta e varionta purschida. 26 exposuras ed expositurs han nezegiau la caschun da presentar lur products als rondund 500 visitaders.

> PAGINA 4

Breil: Cun sliusa e scarsola a val

■ (anr/hh) La sonda vargada ha la cuorsa da sliusas, scarsolas, rods e bobs giu liug a Breil. Il Club da sliusas Breil ha purschiu als biebein 110 participont(als) cundiziuns idealas da concurrenza. Sulettamein per la fin dil secund cuors ei la pista stada empau pli loma. La cuorsa ei vegnida organisada sil tshancun d'Artugl entochen Sogn Giacun sin ina lunghesia da rondund 1,2 kilometers.

> PAGINA 5

Servetsch d'abunents e da distribuziun: tel. 0844 226 226 mail: abo@somedia.ch



Viva debatta davart la cultura

Il cussegl grond ha cumenzà cun la debatta davart la lescha per la promoziun da la cultura

DA MARTIN CABALZAR

■ **Ier suentermezdi ha il cussegl grond cumenzà cun la debatta davart la revisiun totala da la lescha davart la promoziun da la cultura. En ina petiziun drezzan radund 3800 persunas in «appel urgent» al cussegl grond a favor d' in «sustegn substanzial» en favor da la cultura.** La nova lescha per la promoziun da la cultura en il Grischun che duess purtar ina nova valorisaziun da la lavur culturala ed avrir a quella novas perspectivass è amplamain dispitaivla. Gia avant la debatta en il cussegl grond èsi sa mussà ch' i regia tant en la cumissiun predeliberanta da furmaziun e cultura sco en las singulas fracziuns ina gronda dischunitad davart la nova lescha. Cunzunt ils exponents da la cultura fan quitaids che lur basegn urgent per in sustegn substanzial per rinforzar la cultura daventia la finala l'unfrenda d'in cumbat politic.

Gia entaifer la cumissiun predeliberanta hai da blers mainis fitg cuntravers che sa manifesteschan en numerusas propostas da maioritad u da minoritad. Anc pli



Al cumenzament da la sessiun han exponents da la cultura surdà ina petiziun cun passa 3000 signaturas en favor da la cultura. FOTOF ANDRY

divergentas èn las posiziuns da las partidas. Entant che la fracziun socialdemocratica insista sin in credit da rom da 24 milliuns supplementars entaifer otg onns pre-

tenda la pcd in concept strategic per pudair eruir il basegn effectiv da finanziaziun. Ils burgais-democrats vulan insumma renviar la lescha a la regenza pervi da la

mancaza d'in concept strategic. Sustegn chatta questa proposta era dals liberaldemocrats.

> COMMENTARI E PAGINA 3

Aur per Aerni, bronz per Caviezel

DA GION NUTEGN STGIER / ANR

■ **Il success dal team svizzer tar ils Campionadis mundials da skis a San Murezzan cuntinua.** Aur per il Bernais *Luca Aerni* e bronz per il Grischun *Mauro Caviezel* en la cumbinaziun. Tranter els dus è sa plazza cun *Marcel Hirscher* il grond favorit austriac. Atmosfera fenomenala ier a la Corviglia, cun in sulegl che splendu-

rava uschè sco la medaglia dad aur da Luca Aerni, il nov campium mundial en la cumbinaziun. Cun in avantatg il pli minimal gudogna el la cumbinaziun e procura per la terza medaglia dad aur per la Svizra. Suenter la cursa rapida era il skiunz da 23 onns rangà sin il 30avel post e gi da partir sco emprim en il slalom. A nagin dals auters 29 skiunzs èsi gartegia dad esser pli spert e quai er betg a Mar-

cel Hirscher, il defensur dal tìtel. Sin il victur Luca Aerni perda l'Austriac be in tshientavel e da quel retard ha el gi tut auter che plaschair. Il success svizzer ha completà Mauro Caviezel, il skiunz da Tusaun, cun far la medaglia da bronz. Per el in mument da plaschair suenter sias numerusas blessuras ils davos onns.

> PAGINA 2



Luca Aerni che ha gudagnà la cumbinaziun e Mauro Caviezel ch'è daventà terz.

Val Müstair: Ün schi al proget La Sassa/Minschuns

■ (anr/afi) La radunanza cumünala dal cumün da Val Müstair vaiva approvà cun bundant 80 perschient las propostas da la suprastanza cumünala pel proget La Sassa/Minschuns. Cunter quista decisiun d'eira gnü inoltrà ün referendum, quai chi ha fat dabsögn d'una voraziun a l'urna. 60 perschient da las votantas e'ls votants han aderi quista fin d'eivna passada ils quatter differents affars. «Uossa esa important da cuntinuar cullas lavours da progetaziun e verer cha'ls duos progets possan ir parallelmaing ed insembel», disch *Rico Lamprech*, president cumünal dal cumün da Val Müstair. Per *Pio Pitsch*, ün dals iniziants dal referendum, manca amo adüna l'influormaziun transparenta da vart da la suprastanza cumünala. Tenor *Pitsch* cun las calculaziuns dals cuosts per las investiziuns a Minschuns na realistics.

> PAGINA 9

COMMENTARI

Sustegn substanzial ni exercezi d'alibi?

DA MARTIN CABALZAR

Il Grischun ei il sulet cantun triling dalla Svizra. Entaifer sias scheinas s'esviluppan activitads culturals da smarvel. A quella multifariadad culturala contribueschan ton professiunals sco laics. Gia la trilinguitad persula, cun ses idioms e dialects ein ina riezha cun numerusas facetats. Era la cultura populara tradiziunala che cumpeggia cant, musica, teater, museums e bibliotecas enribescha la veta da minga di ellas valladas grischunas. La cultura professiunala cun siu gust d'experimentar dat ultra da quei impurtonts impuls innovativs alla cuntrada culturala. La plurilinguitad persula cun ses numerus idioms e dialects munta ina riezha culturala cun bia facetats. Plinavon eis ei era l'architectura che dat tempra alla cuntrada culturala.

In la tala varietad culturala oblighescha denton era. La cultura scaffescha buca mo identitad e promova la cuminonza. Ella ei era daventada in impurtont element dalla purschida turistica. La cultura ha pia tuttavia era in potenzial economic. Da quei paran ils biars dad esser cuscients. Cu ei va denton per metter a disposiziun ils mieds necessaris ein ins pil pli denton meins aviarts e generus.

In exempel dalla discrepanza denter la declamaziun e voluntad concreta semuossa ella debatta actuala davart la nova lescha per la promoziun dalla cultura. Per che la nova lescha resti buc in document declamatoric senza effect concret eis ei necessari da dotar la promoziun statale cun ina summa concreta. Senza in augment substanzial garantius sur plirs onns vegn la nova lescha degradada ad in pur exercezi d'alibi e daventa in'unfrenda da rivalitads politicas. Deputai burgheis che han aunc buca magunau il debachel cull'Olimpia empruvon ussa da metter pals ellas rodas als seniesters tier la promoziun da cultura. Quei astga buca daventar!

martin.cabalzar@somedia.ch